

**Pembukaan Parlimen Ke-13 Diadakan Dalam Dewan Akibat Jerebu  
Bernama  
25 Jun, 2013**

KUALA LUMPUR, 25 Jun (Bernama) -- Pembukaan Penggal Pertama Parlimen ke-13 Selasa menyaksikan perubahan dari segi atur cara sambutan apabila buat pertama kali majlis perbarisan kawalan kehormat berlangsung di Dewan Bankuet, Bangunan Parlimen.

Secara tradisi atur cara itu sepatutnya diadakan di Dataran Parlimen sejurus ketibaan Yang di-Pertuan Agong, namun terpaksa diubah lokasinya berikutan cuaca berjerebu yang melanda negara sejak akhir-akhir ini.

Kementerian Sumber Asli dan Alam Sekitar melaporkan setakat 8 pagi Selasa, Kuala Lumpur antara 17 kawasan yang mencatatkan Indeks Pencemaran Udara (IPU) tidak sihat apabila merekodkan bacaan 197.

Ketibaan Yang di-Pertuan Agong Tuanku Abdul Halim Mu'adzam Shah dan Raja Permaisuri Agong Tuanku Hajah Haminah di Parlimen pada 10 pagi, disambut Yang Dipertua Dewan Rakyat Tan Sri Pandikar Amin Mulia, dan Yang Dipertua Dewan Negara Tan Sri Abu Zahar Ujang.

Turut menyambut ketibaan Seri Paduka berdua ialah Perdana Menteri Datuk Seri Najib Tun Razak dan isteri Datin Seri Rosmah Mansor.

Tuanku Abdul Halim dan Tuanku Hajah Haminah kemudian diiring masuk ke Dewan Bankuet untuk menerima sembah 'Hormat Diraja' daripada 103 pegawai dan anggota Batalion Pertama RAMD Kem Sungai Besi.

Upacara pemeriksaan kawalan kehormat oleh Yang di-Pertuan Agong tidak diadakan seperti kebiasaannya.

Tepat 10.50 pagi, loceng istiadat dibunyikan sebelum Seri Paduka berdua diiringi masuk ke Dewan Rakyat bagi acara perasmian.

Turut hadir Timbalan Perdana Menteri Tan Sri Muhyiddin Yassin dan isteri Puan Seri Noorainee Abdul Rahman, menteri-menteri kabinet dan perwakilan asing.

Persidangan Dewan Rakyat akan berlangsung selama 16 hari hingga 18 Julai, diikuti sidang Dewan Negara, dari 22 Julai hingga 1 Ogos 2013.

-- BERNAMA

Copyright © 2013 BERNAMA

Source: <http://www.bernama.com/bernama/v7/bm/newsindex.php?id=958656>